

四庫全書

經部

欽定四庫全書

經部
周易辯錄卷一

詳校官太常寺少卿_臣陳桂森

通政使司副使_臣莫瞻菴覆勘

總校官中書_臣朱 鈐

校對官中書_臣王鍾泰

謄錄監生_臣張 濂

欽定四庫全書

經部一

周易辨錄

易類

提要

臣等謹案周易辨錄四卷明楊爵撰爵字伯修富平人嘉靖己丑進士官至山東道監察御史以上疏極論符瑞下詔獄繫七年始得釋事迹具明史本傳其書前有自序題嘉靖二十四年乙巳蓋即其與周怡劉魁等在獄

中講論所作故取繫辭困德之辨一語為名
明史本傳作周易辨說其名小異然藝文志
仍作周易辨錄蓋刊本字誤也所釋惟六十
四卦每卦惟載上下經卦辭然其訓解則六
爻及彖傳象傳皆兼及之特不列其文耳其
說多以人事為主頗剴切著明蓋以正直之
操處枉桎之會幽居遠念寄托良深有未可
以經生常義律之者然自始至終無一字之

怨尤其所以為純臣歟乾隆四十四年八月

恭校上

總纂官

臣紀昀

臣陸錫熊

臣孫士毅

總

校

官

臣

陸費墀

周易辯錄原序

予久蒙幽繫自以負罪深重憂患驚惕之念即夙夜而
恒存也困病中日讀周易以自排遣愚昧管窺或有所
得則隨筆之以備遺忘歲月既久六十四卦之說畧具
矣因名曰周易辯錄繫辭曰困德之辯也吾以驗吾心
之所安力之所勝何如耳若以為實有所見而求灋於
古人焉則吾死罪之餘萬萬所不敢也楊爵書

約し、いふに、

一、

二、

欽定四庫全書

周易辨錄卷一



乾卦

乾元亨利貞

乾卦擬天純陽不亡之義也元亨利貞乾之德也分

而言之有四合而言之元而已氣始動為元流行

為亨以變則寔以化則他為利機藏於靜其動而為

明
楊爵
撰

元亨利者皆具於此為貞乾之四德一誠可以盡之
矣易有聖人之道四焉以言者尚其辭以動者尚其
變以制器者尚其象以卜筮者尚其占然必尚辭尚
變尚象而後可以語尚占也故筮者易中之一義必
配之以道而後可用也繫辭曰吉凶者得失之象也
自坤而至未濟雖情偽萬變莫不以合此天道而為
得為吉戾此天道而為失為凶也悔吝无咎亦即其
得失淺深而言之也大哉乾元為萬物所資以始匪

特資之以始也非乾元則不能有終矣故亨也者亨
此元也利也者利此元也貞也者貞此元也一理流
行而用各不同隨其所至之善而名之耳在人則為
仁義禮智而仁則无所不包發而為惻隱羞惡辭讓
是非而惻隱則无所不貫雲行雨施品物流形天命
之不已而所以為亨也上天之載无聲无臭雲雨品
物顯於聲臭形而下之器也必有形而上之道焉大
明終始會乾道之一本也六位時成識乾道之萬殊

也生而知之也時乘六龍以御天非行六龍由六龍
行安而行之也聖人窮理盡性以至於命乾卦性命
之理畫前之易聖人先得之矣乾道變化由動極而
向於靜之始利之義也萬物各得其性命之正而保
合太和為靜之極貞之義也聖人之德首出庶物以
神道設教於上猶乾道變化也萬國咸寧猶萬物各
正性命而保合太和也元亨者顯諸仁也利貞者藏
諸用也聖人過化存神上下與天地同流者也故配

合而迭言之兩乾相繼天行健之象也君子法天行
健之象而以自強不息焉以義理勝私邪而能要之
以有終也所謂仁以為己任死而後已非天下之至
強其孰能與於此即孔子嘆所未見之剛者也為私
邪所制而間隔其義理之心則懦夫而已矣自強不
息君子入聖之功也勉勉循循持之以敬畏假之以
歲月勿忘助之不已則與至誠无息之聖同歸矣此
欲從末由之際功夫也初九以乾剛得正處最下草

澤中居仁由義之俊傑為龍之潛藏而未見之象也
在國曰市井之臣在野曰草莽之臣皆謂庶人德未
上孚人未見知而欲求用則失身而无以正天下君
子不為也故勿用舜之側微伊尹耕莘說築傅巖孔
子待價孟子不見諸侯皆此道也乾之時固不可以
言否而在君子一時一事未能遂所願則亦否之義
也象曰潛龍勿用陽在下也陽言龍而下言勿用之
義也九二乾剛得中善莫善於此德也位初九之上

則離於潛隱而名實顯著聞其風而興起者宜亦多矣始脫深藏之迹未履明顯之位為龍見在田而光澤耀世之象也以此德而處此地君未嘗不欲其輔已以有為也民未嘗不望其興道以致治也天之生此民也使先知覺後知使先覺覺後覺九二天民之先覺者也以斯道而覺斯民乃其責任也故利見九五之大人相與有為而成正大光明之業則性分之理盡而事天之道得矣九三乾剛得正之君子也知

義理之所在而慷慨以為之者也以其過剛不中強
毅果敢之氣有餘而從容委曲之風不足能以義為
質而於禮行遜出之道或未盡也然質本乾剛識未
嘗不明也力未嘗不強也知其性質之偏而勇於克
勵者又其所能也故終日乾乾而夕猶惕若幾於自
強不息矣下不在田則或疑於田矣上不在天則或
疑於天矣好剛自是一念之差而不自克則或流於
剛惡不自知所處之地所稟之資皆危厲之階也而

致曲之功罔敢自怠故得无咎惟其為九三也故不能无過惟其不安於九三也故能補過象言反復道无終食之間違仁造次必於是顛沛必於是也文言曰行事则无事而不乾乾也曰與時偕行則无時而不乾乾也用力之實則忠信以進德修辭立誠以居業也不能先知之則未有能行之者也故曰知至至之可與幾也知終終之可與存義也知義理之至而求以至之則察之極其精故可與幾所謂始條理者

智之事也知義理之終而求以終之則措之无不當故可與存義所謂終條理者聖之事也即大學格物致知誠意正心中庸明善誠身堯舜禹惟精惟一允執厥中也千古聖賢之學問聖人於此爻發之盡矣龍之在淵時未可出則蟄以潛身時可以出則躍而向天九四以乾剛之德離下乾之上處上乾之下是龍不遠乎淵而出于淵矣未至於天而向乎天矣攝九五之事而未履其位可以躍而不遽躍故為或躍

處躍之道四已曲盡之矣其以剛處柔而善用其剛
矣象言進无咎以其能或而於進之道為无咎也
文言曰自試也試猶考驗也驗之於天而天與之驗
之於人而人歸之非聖人先有姑試之心以天人交
與驗已於天位終不容以固辭也進无咎言其道之
盡善也自試言其心之无私也乾道乃革言離下而
上改革之際變而通之之時也義理所在順適而一
之辭一芥而不知其為小為輕受天位而不知其為

大為重无意必固我之心也惟其下不在田中不在人故進而上亦可也惟其上不在天故退而下亦可也所以上下无常者非干天位而有覬覦之邪心也所以進退无恒者非欲離羣類而出乎其上也蓋君子進德修業預察於義理之至精而所處契於時中之道也改革之際間不容髮精微之極非聖人不能盡也舜避堯之子禹避舜之子皆或之義也舜禹之進斯无咎矣否則居其宮而逼其子為突如來如焚

如死如而无所容矣咎孰大焉不欲遽進而終不能以不進事天之外无容心也或之一言所以立君臣之大防而為萬世之慮深遠矣九五以乾剛中正之德居上卦之中是聖人位乎天位因時立制以化成天下如龍飛于天騰雲雨以澤潤下土之象也其曰利見大人則闢四門明四目達四聰君道之作用勢莫急於此矣聖人垂訓之意遠矣哉堯以不得舜為已憂舜以不得禹皋陶為已憂皆是心也九二在下

修身而見於世之大人也雖德施已普所過必化而未為時用九五見之而弘治化乃其利也人主以論相為職必虛已忘勢而君子始樂為所用也否則謂人莫已若而不足以有為矣上九德則乾之極也位則上之極也以此德而處此地則過於上而不能下龍之亢飛于上而不知蟄以潛身之象也昧於消息盈虛之理進退存亡之道時已極而不知變則與時偕極矣盈滿既久窮災不免顛覆之凶其將至矣故

有悔悔自吉而向凶也伊尹曰臣罔以寵利居成功
周公曰茲予其明農哉知進退存亡而處之以道矣
用九六陽皆變而為陰也首者先之義也陽剛不為
物先則羣龍无首之象也如是而可吉也坤之義地
道也臣道也妻道也用九之義天道也君道也夫道
也特事有可以用柔者而乃為善用其剛也聖人以
天下之才德為才德以天下之聰明為聰明其才德
聰明始高出於億兆人之上矣以堯舜之至聖而用

人施政必咨於四岳九官而舍已從人以為德天道
下際而光明必如是始合於天則而天下治矣否則
自有肺腸自獨俾臧自蔽其耳目而妄行以治亂矣
元為善之長亨為嘉之會利為義之和貞為事之幹
天命之謂性也體仁足以長人嘉會足以合禮利物
足以和義貞固足以幹事率性之謂道也命與性一
也降自天為命具於人為性性與道一也統於心為
性見於行為道體用一原顯微元間也乾之元於時

為春於人為仁而為衆善之長仁義禮智皆善也而
仁統乎義禮智長之義也亨於時為夏於人為禮而
為衆美之會一事一節之合道可以言嘉而不可以
言嘉之會禮則品節文章燦然秩然衆理聚會而无
不備說卦以離為南方之卦萬物皆相見亦此義也
利於時為秋於人為裁成斷制所行合宜而從容中
節也貞於時為冬至理歸藏隨在各足於人為智知
正道而固守之也知正道而固守之智之實豫之義

也事豫則立故為事之幹也體仁與天地萬物為一體君德備矣故足以長人嘉其所會好之既篤行之必至故足以合禮嘉猶書言惟予一人汝嘉之義也物各有則因物付物使之各得其所利物也利物則處得時措之宜而於義无所乖矣程子言處物為義者是也不貞固則不能信以成之而不誠无物矣安能立事故貞固足以幹事元亨利貞乾之四德也非君子體仁義禮智之深者不足以行此四德君子其

可以配天乎故曰乾元亨利貞

乾元統天言元包乎亨利貞也乾元者始而亨言乾
元與亨利貞流行而為一矣亨之後為利利之後為
貞四德一理也始而亨亦性情也必於利貞言性情
主靜者四德之義天地萬物之理皆如此復卦以一
陽始生見天地之心則動而用也此以利貞為性情
則靜而體也其實心與性情貫體用動靜而无不在
也一理始動洋洋乎發育萬物是乾始能以美利利

天下矣然但言利而不言其何所利言何所利則有限而狹小矣不言所利見其无所不利矣乾始之功大矣哉大哉乾乎剛健中正純粹精也剛健之德其體不偏不倚其用无過不及則極於中正矣中正則純然粹然而无不精矣非中正之外復有所謂純粹精也七字之義中正二字可以盡之剛健中正純粹精猶言大德之敦化也六爻發揮猶言小德之川流也蓋時見而見時潛而潛此理也可上而上可下而

下亦此理也。无時无處而非剛健中正純粹精之作
用也。其六爻之發揮曲盡而无餘蘊矣。聖人時中之
道與乾道脗合而无二者也。其繼天出治无非以六
陽旁通之理而時出之。所謂時乘六龍以御天也。雲
行雨施而天下平則治化格天而萬國咸寧也。



坤元亨利牝馬之貞君子有攸往先迷後得主利西南
得朋東北喪朋安貞吉

坤者順而有常之意操順而有常之德以應天下之
故安往而不元亨牝馬之貞即順而有常之德也故
以為利君子之有所往也以先則迷能後則得而主
乎利焉西南則得朋東北則喪朋必至於安貞而與
道為一斯可矣此皆牝馬貞之意而所以致元亨也
故吉元亨者言其通變宜時而應用之不窮也吉則
德盛業廣而事成矣坤之為用贊相乎乾而不自作
地道也妻道也臣道也先則踰理失分凌犯於上而

為天理所不容迷孰大焉臣无有作福作威王食者
而後則得孟子告滕文公為國之道兼舉三代井田
學校之制期以新其國而為王者師答畢戰則告之
以分田制祿之法而已主利者臣職之一事地道長
養萬物之義也主於利而應用當其可則亦利中之
義也西南坤方居易俟命順坤道也東北艮方行險
徼倖反坤道也得道者多助故得朋失道者寡助故
喪朋先迷後得主利以其職分所當為者而戒勉之

也西南得朋東北喪朋以其性分所固有者而致丁寧之意也修其職而未能以義理用事者或有之故戒之勉之極其詳皆詞之不可已者也勉強而未至於安焉者非誠也安貞則順適乎義理之中正而止於至善矣此一節深一節之義也至是則盡性命之理極精微之蘊坤道蓋自我而出之矣乾道則堯舜禹湯文武盡君道者之作用也坤道則稷契臯夔伊傅周召盡臣職者之事也引而伸之觸類而長之則

凡統屬之分才質之宜卷舒運用先後緩急之異施
元非此道而天下之能事畢矣故曰神而明之存乎
其人默而成之不言而信存乎德行

乾元萬物資始坤元萬物資生此孔子之易也乾元
天氣之始坤元地氣之始五行得天之氣而各自以
為氣非有二也如鼓之以雷霆潤之以風雨皆乾之
事而坤不與焉故大可以包乎至而至則大中之一
事以詣其極也乾元易知之始坤元簡能之始施於

天者為乾元而承之於地為坤元天地之氣配合而
无間也至哉坤元為萬物所資以生非自生也以乾
元之知大始順承之而與之生也萬物資生乃順承
天是坤厚載物而德合於无疆矣以厚載物則含弘
矣德合无疆則光大矣含弘言其體光大言其用此
品物所以咸亨也牝馬為地之類則柔順之義也行
地无疆則貞之義也柔順而必利於貞乃君子所行
也柔順而不能貞則失之不及流於柔惡而无所不

至矣豈君子之道哉先之迷以凌分而失道也以先
為失道則後為順而得常道矣西南得朋則與君子
之類同行而可相與以有為矣持此道以有終則國
與民賴之而上下皆有福慶矣東北則反其常道顛
亂迷謬為君子所不與而身不能以自保矣此未能
有終所致也言此者見遵道有終則有慶矣安貞則
與貞為一而非勉強純乎義理而合於坤道之貞矣
故曰應地无疆地勢有高卑則重坤之象也重坤則

至厚之義也君子體重坤之義而以厚德載物焉宇宙間事皆吾分內物也民吾同胞物為吾與非仁者不能有此心也伊尹恥君不及堯舜匹夫匹婦不獲其所若已推而納之溝中真能以厚德載物矣凡君子度量絕人犯而不校之類亦此義也反身而求以至之者惟精察其稟賦之偏蔽而勇克去之則高明廣大可馴致而與天地同體矣初六於履霜之始而即知有堅冰之將至霜與冰同一陰氣之凝也小人

一念萌於利而志不在天理之公即不善之道也患得患失馴習不已而至於極則弑奪之禍所由生知微之君子當於霜未至而慎之焉孳孳為善者舜之徒也孳孳為利者蹠之徒也早於辯而用舍之豈特免於堅冰之禍而且无霜之可虞矣六二柔順中正有和而不流之德存之於心而无私曲則直也措之於行而當於理則方也直其為方之體而方其所以行乎直者也直方而至於大特未化之而下聖人一

等矣以此德而應用焉則宜時通變之機前定於心而弛張盈縮之妙綽乎其有餘不待習於作用而所施自能順利矣此即牝馬之貞後得西南安貞之義也六二之於坤卦可謂克肖之子矣其曰地道光者即安貞之吉應地无疆充實光輝之義也六三爻陰而位則陽陰中有陽為含章之象蓋衣錦尚絅闇然日章之義也不言陰不中正者坤有順德内含章美而將之以順多於陰不中正之義矣據三之才不患

其終於不發也患其發之輕易而或流於躁妄也故
聖人戒之而使其發之中於機會焉發之而中於機
會則發之以時而斯為貞矣留侯之於高帝招四皓
以羽翼太子因沙中之謀教之以平其宿憾而封功
臣得此義矣才可作事而自以為功亦德未純者而
其失易至於此也故復以從王事而无成有終致戒
焉坤為土三居下之上有土諸侯之象也古者諸侯
釋位以間王政不常有也故曰或為王股肱心膂而

從其事則鞠躬盡力代王以終其事而於成功則不敢自有而必歸於君上焉蓋代天理物者人君之責人臣之道主於贊襄輔弼而已幾微有差則大惡基焉非有光大之智不能識也周公曰孺子來相宅其大惇典殷獻民亂為四方新辟作周恭先予旦以多子越御事篤前人成烈答其師作周孚先召公曰予小臣敢以王之讎民百君子越友民保受王威命明德王末有成命王亦顯我非敢勤惟恭奉幣用供王

能祈天永命凡周召所履皆无成有終之義也六四
乘六三陰之不得中者也應初六陰之不得正者也
比六五雖以中德居尊位然陰性易迷柔或不能持
久况亦不得其正流而為反覆顛倒不難矣所比所
乘所應皆若是而四獨以居陰得正與其間難乎其
為處矣若四者衡門之下可以棲遲默以求容而冀
免於刑戮斯可焉以重陰而務晦藏聖人因其才質
之宜而教以處身之義也苟輕自漏泄務為譏評撩

虺蛇之首踐虎狼之尾殺身不足惜而於世道益難
矣此有道君子所深戒也若欲轉移斯世使陽德漸
亨而向於治四雖居正而質陰柔亦非有撥亂反正
之才也故无譽六五以柔順之德而位上卦之中是
以中德而居尊位也以中德而居尊位則能以身心
所得者而化成天下矣為黃裳之象黃也者不偏不
倚之體天德也裳也者无過不及之用王道也天德
王道所謂合内外之道也成功文章燦然秩然而本

於心德之數措黃裳之義也裳為身之章取發外之
義不曰衣而曰裳者上衣下裳為乾坤之象聖人取
義之精如此所謂其詞文其言曲而中者此亦一義
也凡列爵分土井田學校所以裁成天地之道輔相
天地之宜維持之以紀綱涵濡之以禮樂事業之大
彌六合而无間者皆自一念之微所發越而亦非有
所增益於性分之外也至是則君道盡而代天理物
之任无歉矣故元吉上六陰盛之極與陽相搏擊坤

為地居卦之終則龍戰于野之象也上六言龍非真龍也特以力強而敵乎龍故稱龍焉初六言堅冰至亦於上六驗之矣當小人類霜之始其勢固甚微也使國有人焉制而去之不難矣及馴習積累而至於盛則假政柄以制君子之去留終於君子盡去小人獨存而成天地閉塞之世至是則亦末如之何矣人之云亡邦國殄瘁未有國无君子而國不亡者也未有國亡而小人能保其富貴者也故君子小人同一

傷也而君子則傷於當戰之時小人則傷於既戰之後既戰之後國本已撥小人夷滅之禍即不旋踵而至矣其血玄黃聖人不獨示君子以知幾遠害之道而所以喻小人者亦明且切矣初六象言馴致其道
上六則曰其道窮也上六已窮之道即初六馴致之道也蓋至是則善類已空國勢顛覆小人者雖欲容身保位而謀慮已窮元所施矣觀兩象之詞見聖人扶陽抑陰為天地生民之慮深遠矣用六者六爻之

陰皆變而為陽也陰柔之性見之不能明守之不能固變而為陽則愚可至於明柔可至於強而能長久於義理之正矣故利永貞變之道无他焉博學審問慎思明辨篤行人一能之已百之人十能之已千之斯可矣剝盡為坤純陰之卦於時為消於事為惡天理絕盡之世也然卦之德為順可以順乎理卦之象為地可以配乎天順理希天可以成大有為之業矣故聖人畧其消慝之迹盡神化鼓舞之道出其意

料思慮之外而裁成之其有進善之才者則誘掖之
欲其善之進而極於成焉有去惡之心者則防戒之
欲其惡之去而至於盡焉不敢以清明之事業而絕
望於昏濁之世也蓋聖人視天下元不可為之時亦
元不可變之人此有教元類之義與人為善之心也
所謂化而裁之謂之變推而行之謂之通舉而措之
天下之民謂之事業也於其用六而復言利永貞見
卦與諸爻皆不足於義理之純粹變而為陽始可以

進於有為焉則又正本之論也春秋戰國之君不足以擬湯武之聖德孔孟固已知之矣所以惓惓接引而與相周旋者欲其一變至道而以大終也不然則庸劣蔽錮之深豈可望以三代之治化而孔孟者顧席不暇暖而皇皇終身欲何為哉此皆用六永貞之義也



震下
坎上

屯元亨利貞勿用有攸往利建侯

屯者不能伸舒之意坤之初交於乾之初得震剛柔
之始交也剛柔始交方欲有為乃遇險而難生焉則
不能伸舒矣震動在下坎險在上是能動乎險中矣
動乎險中則操縱之機猶在我而不為人所盡制焉
故得元亨在險則宜守正正者萬世不易之常道處
險處夷皆不可須臾離者在險而有不正焉則所以
速其禍而險愈甚矣故尤所當戒雷雨之動滿盈則
晦冥震撼之勢方殷而驅除平定之道誠難措手故

勿用有攸往當此天運草昧之初混亂漫散未有統
一英雄豪傑欲起而救之必利於建侯焉建侯則名
分已定而恩威激勸者有其人矣濟屯之道莫先於
此自古有為之君當屯難之世披荆棘歷險阻至於
不遑寢食而始克有濟焉勿用有攸往則不可輕以
有為而建侯則又不可安於无為焉先後緩急固有
其幾而不可失也經綸治絲之事君子拯屯順時勢
相機宜而為之也初九當屯之初時方難為上應六

四則險陷之爻而勢又不可以輕動故有盤桓難進之象當屯初而遇險陷固不可不居貞而初九陽剛得正又有能居貞之象君子行一不義殺一不辜而得天下不為行一不義殺一不辜而得免於死亦不為何所往而可離於正乎以此得正方亨之陽德而處卦之最下則能以貴下賤得民心而可以濟屯矣故利建侯六二上應九五乃其正應之君也下乘初九乃强暴之寇也當屯之時事方難為五在險中力

又不足以援二故二動不能伸舒遑回不進而乘馬
班如焉班如但列為班行定處而不能進之象初九
非為二之害也求與為婚媾耳二柔順中正女子守
貞之象也守貞則不字於初矣至於十年之久則數
窮理極而字於五字許嫁為臣服之義也竇融終舍
隗囂而歸於光武其時其事皆類此六三陰柔不中
不正无濟屯之才德者也上无應與而切近於險陷
其時其勢又難為也於是而不動可也三居動體之

極而性又為輕動者也以如此之才德當如此之時
勢而欲輕動以濟屯焉則為逐鹿无虞人以導之而
陷入林中之象君子見幾舍之勿逐可也若往而逐
之屢舉而屢无成徒取羞吝而已殷浩北伐有類此
爻六四居陰得正上承九五當濟屯之責任者也陰
柔才弱不能獨濟為乘馬班如之象下應初九陽剛
得正有過人之才德者也求親斯人與之同往則吉
而无不利矣得人者昌失人者亡四知求初相與有

為可謂明也已矣坎為水有膏澤之象九五坎體而陷於險中為屯其膏澤而不得下於民者也五之所為於道或未盡焉若能惇典庸禮命德討罪允合乎天命人心之正則一德所及遠近協服小人安能陷之而使屯其膏乎故象言其施未光蓋深不足於五也當是時若小貞之則可得吉若大貞之則凶立至矣小貞則小有所為而不失其正也大貞則必去小人之陷已而欲大有所為也魯昭公自取出亡則凶

之驗也上六處屯之終險之極屯終則時可濟險極
有出險之理若以剛陽之才處之濟之如反掌耳上
六陰柔明不足以有見才不足以有為愈見其屯而
險也故有乘馬班如泣血連如之象至是而已不能
濟必有濟之者矣若上六者將為人所有焉故曰何
可長也



坎下
艮上

蒙亨匪我求童蒙童蒙求我初筮告再三瀆瀆則不告

利貞

蒙與明相反蒙昧而不明也山下有險則迷於所向
矣險而止則懷險心而怠於問學矣皆所以為蒙也
蒙之可亨理義之心開而可以至於明矣此由九二
之道可以發人之蒙而所以發之者又得其時之中
也九二以剛中之德與六五之童蒙正相應非二求
五乃五求二學者教者之志自相應也求之者其心
虛以誠則應之者亦樂以成其美矣凡筮蓍求神其

初筮則无有不誠者若再三則輕瀆而失其誠矣五之求二有初筮之誠二則告之再三則為瀆瀆則二不告矣求之者其心專應之者當其可二之發蒙可謂得時中之道矣此蒙之所以亨也二可謂誨人不倦之聖賢五亦有希賢希聖之志者矣教之而不以正則所知所行差之毫釐謬以千里非聖賢以人事天之學問也堯舜之精一孔門之擇善固執格致誠正程朱之居敬窮理知行並進皆聖賢大中至正之

道也當童蒙之時而養之以正則可以至於聖人矣
故為作聖之功山下出泉未有所歸亦蒙之象也泉
之出必放乎四海君子之果行似之必盈科而後進
君子之育德似之初六以陰居下稟賦之昏弱人品
之卑下則蒙之甚而不可不發也又當發蒙之初法
不可以不正故利用刑人用刑人書所謂扑作教刑
也又當暫止其刑而涵育優柔使以漸而入於善焉
為用說桎梏桎梏固刑之類也用刑之嚴而過於束

縛亦桎梏之象也用說之則立法固為甚嚴而用法則又濟之以寬使學之者既有嚴憚恐懼之心而又有樂於進修之志可謂善發蒙矣若一於嚴則情所難堪聒之以明之所難知驅之以力之所難行為教之失其道而无益於蒙者矣故往吝九二當發蒙之任剛而得中為包容衆蒙之象包容之則往者不追來者不拒以是心至斯受之而已隨才成就而不過求皆在其中矣以陽應陰來為納婦吉以下任上事

為子克家爻具此象關於世教之大故聖人歷言之
凡卦爻取象善可為訓者則詳言之而畧其所次焉
六三以陰不中正而應上九不正之陽剛是女之見
金夫而不有其身之象也上九以不正居上是无德
善而徒以財自右者也為金夫之象女之從之則廉
恥之道喪而同人類於禽獸矣天下之至蒙莫甚於
此而可以為戒者也何利之有六四以陰居陰重陰
而又不中則為蒙之甚矣下不應於二上不應於上

遠於陽剛而无以發其蒙為困於蒙矣自是其愚蒙而不親近君子以開啓之可吝之甚也聖人以困蒙之吝為獨遠實謂非其資稟之下而由其遠賢以自棄也以見人性皆善聖人可學雖昏愚之至而善反之至於知之成功而為一焉則與生知安行者同歸矣其垂訓之意遠矣哉六五虛中以應九二之陽剛是純真之本質未散而委心聽順受教於君子也書所謂能自得師者也希賢希聖希天皆其所優為者

也故吉上九以陽剛居上治蒙過剛為擊搏於蒙之象進人不顧其安使人不顧其誠其施之悖求之拂反為害矣教者不利如此為寇但禦學者之寇可也凡外誘之私蔽其明而亂其真皆寇也為去其私而使全其善禦寇之義也學之教之固多術而皆所以禦寇也上九非能禦寇者聖人以其失在於為寇故以此義訓之以此剛而禦寇則教者學者皆得其道而順矣



乾下
坎上

需有孚光亨貞吉利涉大川

需須也待之義也坎險在前乾以剛健臨之剛健則
事有定見處有定力不遽進以陷於險待之義也其
運用之機在我可不至於困窮矣陷於險中則為困
窮需之所貴在於有孚以誠心而需則其心光明而
道可亨通心或不誠安得光明何能致亨人之所需
固有其心有孚而不得為貞者有孚而貞則誠心為

禮而无非禮之禮誠心為義而无非義之義合於大
中至正之道矣如孔子之待價孟子之待招則貞之
至也其他沮溺荷篠之類高尚之過而至於絕人逃
世焉心固有孚而貞則未也卦之九五以中正之德
而居天位則德與位稱道可大行為有孚光亨貞吉
之象也需之為用出處之節應機之宜其道廣大精
微非時中之君子未能與於斯焉需之以貞則有所
不為矣利涉大川可以大有為也孟子言枉己者未

有能正人者也况辱已以正天下乎又曰天下溺援之以道子欲手援天下乎此亦貞吉涉川之義也窮理守義之學至則可以用需矣雲上於天亦需之象也待其自雨耳事固有當需者君子自養以待之而已如諸葛孔明隱於南陽非先主三顧之誠則有自養以待時而已此酒食宴樂之義也他事亦有當需者當需而不需焉則為過動不當需而需焉則為怠緩需之道未易言也初九需于郊則遠於險難矣利

用恒則終不變其所守矣郭林宗申屠蟠可以當之
孔子之歷聘諸國仕止久速應以神化之道人莫之
能測莫之能制則需郊用恒之大者也无咎不足言
矣九二需于沙沙近水所有之物需于沙去坎險不
遠矣人臣以身任國家之利害其迹危厲者似之豈
能免於言語譏謗之傷乎二以剛中之道處之以寬
裕之誠則可以免於患害而終吉矣唐德宗欲易太
子李泌身當其事雖有危言之及卒能定天下之大

計而得免於害此爻似之九三迫近坎水則需于泥之象已及於危難矣其時其地則切比於災而三之過剛不中又所以速其災也至惡者亦可反而為至善矣况三之剛正者乎若能敬慎則善之善者矣何寇之可憂乎三能敬修其德是以過人之資而潛心於聖賢之學也但可不敗而不能如二之終吉何也時甚難而為力不易者也六四已入于險而身處殺傷之地矣為需于血之象坎之陰爻有穴之象以柔

居柔而得其正順而聽之終能免害者也是能出自
穴矣四可謂幾死而復得生者也處危難之道以過
于剛而速禍君子不為也以過於柔而免禍君子不
為也君子守吾之正而已守其正而免於害固其所
也不幸而至於殺身焉君子不恤也九五以陽剛中
正而居尊位是有君德而盡君道者也君德厚而君
道盡至是則有自養以待天下之治安而已酒食自
養之象也五之所當自養者非以逸豫而已也廣求

賢俊布諸左右論思啓沃涵育氣質薰陶德性而已
矣如五之中正若无待於自養矣禹之告舜曰无若
丹朱傲惟慢遊是好舜之命其臣亦曰汝亦昌言又
曰臣作朕股肱耳目此皆不自聖而汲汲於自養者
也若一念怠惰則聖反為狂四海困窮天祿永終矣
可不戒哉上六以陰柔居險極无出險之才已陷而
入于穴矣不速之客不召之客也三人下三陽也乾
三陽本在上之物以見險而需今需極相時而上進

矣上六若能敬之則藉君子之拯而可以出險矣故
終吉居卦之上无職位者也與九三居下之上為應
似為失矣然志在出險而非僥倖以求進也故无大
失言未大失則已有失矣君子之處險陷寧身被困
辱而不徇人以非禮之恭上六敬之而免禍聖人亦
未深許之也



坎下
乾上

訟有孚窒惕中吉終凶利見大人不利涉大川

訟爭辯也以惡逆相及者也堯言其子之惡曰囂訟則訟為惡逆可知矣卦以坎遇乾上以剛暴制其下下以險機伺其上又已險而彼健皆以惡逆相加者也又內險而外健是習為惡逆者也訟之事或已是而直心不能以自白於是惕然省懼而處之以得中則吉所謂處之以得中者或天理民彝所不可已者則辯明其心迹而已其他所可已者則置之而勿校焉君子以仁禮存心而至於三自反焉橫逆之加以

禽獸視之而已又何訟焉卦之九二剛來而得中有孚窒惕中之象也若不處之以得中之道則必終極其訟而得凶矣此反其所為而戒之也上九過剛亦有終極其訟之象九五剛健中正以居尊位有大人之象訟之利見大人或啓其息訟之心或處其所訟之事如以難得者兄弟易求者田土之數言感訟者之流涕相讓則大人真可以利見矣訟之事不可以涉險難而為之要在可止而止矣上剛下險險而健


非有涉川之用與涉川之才也天與水違行亦有訟之象作事謀始存仁讓之心而慎守之犯而不較則訟可絕矣初六以陰居下其才其勢皆不能為訟者但明辯其心斯已矣故為不永所事小有言而終吉也訟之事有容德乃大其次則能忍亦不失為厚也初六能忍者也九二當訟之時與九五訟者也二知五之勢不可敵乃歸而逋竄不復與訟而自潛於三百戶之小邑始得免於災眚焉邑人三百戶自處卑

小之象也二有欲訟之心者以剛而又為險之主也能自卑而免於害以得中也乾之中交於坤之中為坎坤為邑九二居二陰之中潛於小邑之象也二可謂畏天之威以自保者也否則自下訟上而患自掇亡无日矣訟者皆攘奪於人以為已有者也六三陰柔非能訟者但食舊德安其素分而无外求則可矣然訟之時以强凌弱以衆暴寡者也三雖不能為訟而處强衆凌暴之時雖自能守正而迹亦危矣居下

之上有時事之責者也謹敕而免於為惡耳為善而成功則非所能也故從王事則无成九四陽剛本欲訟者然以陽居陰為能濟以柔處上之下為能順上命上之命下何嘗欲其相訟而至於為惡乎四有欲訟之心幾於犯王命矣不克訟則渝變其心安處正道而得吉矣九五當訟之時以陽剛中正之德而居尊位有中天下而立定四海之民之責與道焉者也匪徒能聽訟而已蓋必以道化民使近天子之光而

至於无訟者也故元吉不然則區區於折獄之間而治其末亦何足尚哉故象曰訟元吉以中正也謂感之以至德而民寡過矣上九以剛居訟極而處最上是健訟終吉而能伸者也故有錫之鞶帶之象鞶帶命服之飾上錫下者也以无實之訟至惑上所聽而遂其所欲焉即上之所與也未有得非其道而可常有者也故終朝三褫之終朝之間而至於三褫則辱已甚矣不如无所得之為愈也凡用勢力機巧而倖

有所得者亦此類也縱无三禡則廉恥之道喪矣



師貞丈人吉无咎

師為兵衆本義釋之備矣兵者聖人不得已而用之
有應敵之兵有問罪之兵用之以道皆為正否則強
暴寇盜而已將在得人老成長者臨事而懼好謀而
成有平定安戢之功而无屠城掠地之失肩侯之征
義和殲厥渠魁脇從罔治舊染汙俗咸與維新丈人

所為蓋如此漢之趙充國宋之曹彬皆其人也師出以正又得老成之人用之則吉而无咎彖以師貞合而釋之故曰師衆也貞正也能以衆正可以王矣此湯武之師也齊桓公責楚包茅不貢王祭不供未為不正假之而已九二有剛中之德上有六五之應是剛中而應也居坎之中上下五陰順之為行險而順也將以剛中則威克厥愛有應焉則欽承天子威命也戰危事行險也東面而征西夷怨南面而征北狄

怨曰奚為後我則人心之順也毒天下毒其所當毒者除殘去暴是也地中有水亦衆之象也容民保民也所保之民即所畜之兵也无事則為服牛乘馬之順民有事則皆披堅執銳之勇士矣初六未取於陰陽應與而取其在師之初之義也出師之初在謹其律如嚴部伍禁侵掠皆是也以律行師之法當然而未必其吉也否戒則凶即至矣如孔明伐魏戎陣整齊號令嚴明合於以律之義馬謖街亭之敗違亮節

制則以否臧而凶矣九二有剛中之德上為五所應
所謂王者遣將跪而推轂曰間以內寡人制之間以
外將軍制之任之專而委之重故九二得以盡其才
德而成功焉後世進止遲速率由中制之雖有賢將
安能有為九二在師而得中道用師之貞出師以律
皆是也故吉而无咎師有吉而有咎者有无咎而未
能得吉者吉且无咎善之善矣將能成功則王有報
賞之典錫命至三寵賚之者至矣所以錄其懷柔萬

邦之功而嘉之也六三不中不正居險之極非有為
將之才德而欲僥倖以成功者也故師或興尸而凶
將不知兵以其君與敵也君不擇將以其國與敵也
凶孰甚焉六四以陰居陰柔而得正是能整兵慎戰
而不輕進者也雖无克敵之功得以全師而歸故无
咎春秋伐楚而書次者以次為善師六四无咎之義
也六五柔順而得中柔順則自不為兵端得中則侵
暴之兵加於已亦必起而應之是田有禽而利於搏

執之也言語辭禽鹿豕之類所以害田者也又以其
陰柔或不能專任君子而使小人參之則是使之興
尸而歸雖應敵之正兵而亦不免於凶矣長子謂九
二凡才德為君子之類者皆是也弟子凡次於九二
而為小人之類者皆是也上六用師之終天下大難
皆已定矣則論功行賞之時也功之大者間之以有
國而為諸侯功之次者承之以有家而為大夫坤為
邑有國與家之象焉軍旅之際有謀有勇皆能成功

而未必皆君子也若賞以國邑是使肆其毒以虐民也故戒其勿用大君以爵賞正人功之大小而復用小人則禍基於此而邦必亂矣



坤下
坎上

比吉原筮元永貞无咎不寧方來後夫凶

比自有得吉之理比輔也輔則下順從之義也安有下順從以輔之而不獲於吉乎當此比輔之時必推原考筮已有元永貞之德然後可以當其比輔而元

咎否則或以力驅之而已安得免於咎乎元者善之
長君德也君德至於永貞則純乎天矣不寧者不遑
寧處有憂勤惕厲之心者也天之立君以一人治天
下而勞之非以天下奉一人而逸之也君人者頃刻
謹畏之不存則怠忽之所自起毫髮幾微之不察則
禍患之所自生有此不寧之心則下之比輔方感而
來矣九五以剛中之德居尊位而上下應之是有君
德存敬畏之心而得民之歸赴之象也夫者丈夫之

稱左傳曰是謂我非夫也後如先事後得之後怠緩之也於君子而怠緩之則賢者退處小人類進而人將離叛而不輔矣則道窮而凶矣地上有水比之象也建立萬國之諸侯而定巡述之禮以親之先王所以盡比之道也初六居下順體是能比上者也比上而有信實之德則終始无間而免於咎矣若有孚至於盈缶則不但无咎而已且有他吉也有孚盈缶則信之至也草澤之間有懷至信之德者安能久在下

乎此他吉也六二上比九五也柔順中正則比之自
內得正而吉矣內取由中之義事君以道而出於中
心之誠也所謂責難於君謂之恭陳善閉邪謂之敬
非堯舜之道不敢陳於王前者皆是也如此則僅可
以免過而不自失也臣道之難盡也如此六三陰柔
不中正處已非其道也君子小人類聚群分而所比
皆非其人矣六四位在九五之下比之時皆以下比
上也四柔而得正以是而比五則能以柔濟其剛都

俞吁咈皆以道而不離於正也則有引君當道志於仁之忠矣故吉九五陽剛中正以居尊位用大中至正之道而顯以比天下者也如孟子所言王道皆為顯比建萬國親諸侯以其一端也先王托股肱耳目於臣下以次承宣而達諸天下則為顯比霸者用其私智小小補塞則曖昧而非顯比也王者田獵用三驅之網去其一面不盡取之取其不用命而入者舜之班師振旅誕敷文德而有苗來格是也失前禽邑

人不誠邑人之心亦上之心也知其以德化民而不以威驅之也皆吉之道也上六居卦之上為首之象當比之時下无應與為比之无首之象比已終矣而獨无所比則死亡无日矣故凶

䷇ 乾下
巽上

小畜亨密雲不雨自我西郊

小陰也畜止之也六四以陰居陰為柔得位柔不得位則不能畜陽柔既得位則有以致上下之應而為

其所畜矣小人而无才无位者亦安能制君子哉以
巽畜乾亦為小畜又以陰畜陽亦不能大有所畜小
人畜君子畜其不能用世耳於其道則无如之何所
畜者區區之微末耳小畜之時陽猶可亨卦之內健
外巽二五以剛得中而志猶得行君子之作用亦未
盡為小人者所畜也故亨小人未能盡制君子之作
用則所畜尚未遂也故有密雲不雨自我西郊之象
雲為雨氣陰物也陽氣上升而雲密畜之則相持為

雨而下畜之未極則氣猶騰往而不雨矣天地間東南為陽西北為陰凡陽唱則陽畜陰陰和而成雨陰唱則陰畜陽陽不和而不雨密雲之不雨亦自我西郊之義也元小畜則元所謂密雲元所謂西郊有小畜則有密雲西郊之象不能遂其所畜則有不雨之象不雨與亨之義相反君子小人勢不能以俱盛也若以為善言之凡臣不能止君之欲子不能止父之過皆此義也畜有止之之義有聚之之義止則聚矣

風行天上則氣即散往而不能聚有小畜之象君子以懿美其文德而已美在其中為畜之大威儀文詞之間而致其美則所畜者小矣小人畜君子必制之使不得遂其所為畜之未極則君子猶得以安其位而行其志君子者始焉若將失其所矣而終得以復其所此小畜之初二皆以復為言也初九乾剛得正雖與四為正應去之尚遠不為所畜猶得進而上行則復之自道矣守正不變而卒得復則復自道矣若

非禮求進則復不以道而為以邪媚干澤矣自道而復則无咎而可以行所學以益世其義自當獲吉也九二漸近於陰若將為其所畜矣以所處得中而不自失又與初同體皆陽剛之君子也相資相援進而為則牽復之象而吉也蓋初九結綬則九二彈冠其出與處同一道也九三迫近於四以過剛不中處之失當為四所畜而不能自行為輿說輻之象輻者輿之所以行者也說之則不能行矣夫謂三妻謂四

四畜三使不得上進三不受其畜而與之爭情不相
得則夫妻反目之象也大丈夫處人而不為人所處
非四之能畜三也乃三不能處乎四也故象言夫妻
反目不能正室所以責君子不能自盡其處小人之
道也處之之道何如謹於自治而不陷於失使小人
无得以議之至誠以與之恭遜以接之彼小人者大
則革心小則革面矣何能畜於君子乎六四為畜之
主以畜道為尚者也柔得其正位近九五是能以誠

心而畜五者也所謂以柔濟剛以可濟否者四之心也直道難容若四者懷恐懼之心而幾不免於傷害也九五剛得中而又巽體於四之畜已見其為忠直而不見其為乖忤知求之以道不以非道而罪之焉故四得免於傷害憂懼為血去惕出之象而无咎也象謂上合志言其與九五相合也事君數斯辱矣六四之尚畜道比之以道事君不可則止者則有間矣故僅可无咎而未獲吉九五居尊爵賞刑誅皆其所

有人以實心效力而為已用如以手把物摩固而不
可解已之勢力足以驅人而使為用如以富而以其
鄰則其鄰孰不樂趨以為用乎九五之君臣同心如
身之使臂如臂之使指投之所向无不如意者也然
不言吉凶者未知其同心同德而施之於畜道者何
所用也若用之於畜小人畜已之私欲而不自肆則
同心為善而元吉可致反是則流於惡而凶至矣小
畜之時多小人畜君子而四之畜五則又用之於為

善也九五勢其所有法其自用而下无應與用其力
以為惡未可知也陽剛中正而又巽體才亦足以為
善矣故聖人但言其力足以有為而畧其善惡與吉
凶直不欲以小人待九五其垂戒之意深矣上九以
巽體居小畜之極巽順於以陰畜陽積之以漸至於
其極則畜道成而陰陽和矣為既雨既處之象以陰
畜陽小人自以為德而尚之以至於積滿矣至是則
諸陽與之相抗者或苟說富貴或僅期免禍而聽其

命矣以陰畜陽小人制君子婦人乘其夫皆此義也
婦若貞固守此則危道也月陰象幾望而抗陽將至
自食而反傷矣安有小人畜君子而天下不亂者乎
亂則小人豈能保其富貴哉此皆切戒小人之詞也
君子至是亦不可行行則凶矣此又喻君子以自處
之道也易為君子謀不為小人謀可見矣


兌下
乾上

履虎尾不咥人亨

以兌遇乾和說以躡剛強之後和說有恭遜之義剛
強有果確之義恭遜果確則嚴而泰禮也禮為人所
當履故卦名履以和說履剛強則處已處人之道盡
而不為所傷有履虎尾不咥人之象而可以致亨和
說為處剛強之道非倖福免禍而為流蕩者也九五
以剛中正履帝位而不疚其德光明人之所履當如
此也人之所履宜隨其分而修其所當為故上天下
澤則上下之分定而為履也君子觀此象則辯上下

定民志民志未定由上下之分未辯也上下之分既
辯則民安其所而不妄求其志定矣初九陽剛得正
居履之初是以素所修者而為履之始格致誠正之
學措而為治平之用未為物誘而變其所守者也執
此道以往則无咎矣人之修己所願者在行所學以
治人也初九素履之往可謂不失所志而獨行願也
九二陽剛得中上无應與有道君子未為世用而不
求人知者也為履道坦坦之象坦坦平易也兌有和

說之德平易之義也幽隱守高之人能如此則正而吉矣眇不能視而強欲視跛不能履而強欲履才不足以有為而強欲為也六三陰不中正而處乎陽故有此象是才柔而志剛也以此履剛強之乾必見傷害為履虎尾咥人之象而凶也又以志剛而居下之上有武人為于大君之象武人无德肆其剛暴以強力而為大君安能久乎以兌遇乾則乾為虎而兌有履虎尾之象四近五則五為虎而四亦有履虎尾之

象九四剛而能柔者也是常存戒懼之心者也以此
德而履五之下則剛不至於取禍柔不至於取辱輔
德納誨之志行于五而得終吉也以堯舜之聰明聖
智君道之盡宜若易為矣然求賢任官必勤咨於下
而不自專九五以乾剛居尊下以兌說應之有順從
而无矯拂則任意裁決而无留難為果決其履之象
天位惟艱一念不謹或貽生民无窮之害而天祿永
終矣守此夬履以為正則危之甚也上九以陽剛乾

體而居履之終是所謂終日乾乾夕惕若履善道而能有終者也蓋乾剛則以仁為己任有終則死而後已曾子易簣而歿是也視其如此之履而考其所宜獲之祥則周旋皆得元吉矣其旋元吉言元適而非元吉也斯人也進則有益於君德退則有益於風俗盛德大業人未易及故曰元吉在上大有慶也

周易辯錄卷一